

李文忠公奏稿

李文忠公奏稿

卷之四十五目錄

謝平定朝鮮獎敘摺

光緒八年九月初五日

奏留周盛傳片

光緒八年九月初五日

歸化稅項援案撥補摺

光緒八年九月二十九日

撥協朝鮮礮彈片

光緒八年九月二十九日

議覆張佩綸條陳六事摺

光緒八年十月初五日

代朝鮮聘西士片

光緒八年十月初五日
附朝王來咨

奏明答覆朝王三事摺

光緒八年十月十二日
附來覆咨各三道

查覆馬建忠參案摺

光緒八年十月十二日

朝鮮會勘邊界摺

光緒八年十二月初八日
附來咨

奏明朝王咨謝二事片

光緒八年十二月初八日
附來咨

商局接辦電綫摺

光緒八年十二月初八日

海防支應請銷摺

光緒八年十二月十七日

吳毓蘭政蹟片

光緒八年十二月十七日

李文忠公奏稿卷四十五

全集一之四十五

桐城吳汝綸編錄

謝平定朝鮮獎敘摺

光緒八年九月初五日

奏爲恭謝

天恩仰祈

聖鑒事竊臣接准兵部火票遞到光緒八年九月初一日內閣奉上諭此次朝鮮亂軍生變張樹聲先後奏派提督吳長慶等率師東渡並特召李鴻章前赴天津會同查辦旬日之間該國亂黨悉平局勢大定辦理甚爲妥速李鴻章創練水師深資得力著交部從優議敘等因欽此當卽恭設香案望

闕叩頭謝

恩伏念臣持服去官里廬踰伏屬三韓之告警奉

再命以邁征追行旌駛抵於北溟而捷報已傳於東海此皆在事
諸臣稟承

廟算憑仗

天威故能扶危定傾有征無戰而微臣來從遠道幸告成功初未
戮力於行閒復鮮運籌於幄內迺蒙

溫綸渥被甄敘優加因後效而

錄前勞不忘有開必先之意貪天功以爲己力轉益因人成事之
慚再四思維理應籲請

收回成命但恐外閒不察不以爲矯情而鎮物卽以爲怙
寵而遺榮是以未敢固辭上瀆

聖聽惟有勤求訓練愼固邊防學在四鄰守在四鄰勉贊梯航之
盛治輔以羣策聯以羣力廣接泝澣之良方以仰答

高厚生成於萬一所有微臣感激下忱謹摺恭謝
天恩伏乞

皇太后

皇上聖鑒謹

奏

奏留周盛傳片

光緒八年九月初五日

再據新授湖南提督周盛傳咨呈籲請

陛見一摺奉

旨著來見欽此該提督以海口防軍需人統率商請派員接替以便交卸起程等語臣查周盛傳所部淮勇馬步十五營分紮津郡小站馬廠等處人數眾多地段遼闊操防彈壓關係重要非威望夙著情形熟悉之員不足以資督率周盛傳新拜

殊恩亟思趨聆

聖訓但現值

微臣

回津整飭海防之際軍中統將若不得人實恐

貽誤

臣

左右思維竟無妥人可以替代上月子牙河趙扶村西隄

漫決經該提督親赴工次分調弁勇晝夜搶堵目下決口雖已合龍而隄身被水淘刷者尙有二百四十餘丈之多亟應及時培補

以免蟄陷事關要工亦宜責令就近兼顧始終其事可否仰懇
天恩飭令該提督暫緩入都一俟防務稍鬆隄工就緒再行晉京
陛見之處出自

聖裁是否有當理合附片具陳伏乞

聖鑒訓示謹

奏

歸化稅項援案撥補摺

光緒八年九月二十九日

奏爲山西歸化關稅項短絀擬請援案撥補恭摺仰祈

聖鑒事竊准山西撫臣張之洞咨稱近因歸化關常年額稅徵收

短絀飭據歸綏道稟稱因洋商執持津海關三聯單赴歸采買土

貨稅項均歸津關代徵以致每年短徵至五千餘兩之多前經咨

請查照英約第二十八款所載擬令各洋商此後赴歸買貨仍在

首經之歸化關輸交內地半稅以期敷衍額解嗣非咨擬以事關

交涉應由總理衙門核定飭遵現經咨准總理衙門覆稱查洋商

請領報單赴內地買土貨應完內地半稅原約係在首經之于口

輸交後以產貨地方未必皆有關卡勢難一律辦理因又增立善

後條約第七款聲明由第一子口驗貨給照至最後子口先赴出

口海關報完內地稅項此章行之已久若令於歸化一處專歸首

經之子口完納未免辦理兩歧惟歸化關稅項因此短絀查光緒五年十月間四川總督丁寶楨會同湖廣總督李瀚章奏請將夔關短徵額稅按照宜昌江漢兩關每年所收出入川省子口半稅銀數准其劃抵經本衙門會同戶部核准有案行令會商北洋大臣奏明辦理咨請酌核會奏到臣復經飭據津海關道周馥詳稱新關徵收子口稅銀向係隨同戶關一年期滿時分晰造報並於新關洋稅奏銷案內按三箇月一結聲明子口稅若干彙入各項六成洋稅內撥發天津海防支應局練兵月餉從前天津戶關短收稅銀經戶部議准由子口稅撥補同治元二三年張家口崇文門坐糧廳等關短徵盈餘銀兩亦經戶部議奏將天津海關所收子稅酌中撥補但實銀並未解部仍循案支放兵餉又同治四年戶部議奏張家口短收稅銀案內稱張家口短收盈餘稅爲數甚

鉅津關子稅所收不敷撥補嗣後各關如有短收除本關所徵洋
商子稅准其照案撥補由部隨時酌核辦理外其餘概不准紛紛
撥補以免紛歧各等情前來臣查歸化關近因洋商領單采買土
貨以致稅項短絀自係實情既經總理衙門援引四川夔關核准
撥補成案自應奏明變通辦理以顧考成擬請自光緒八年四月
十八日天津戶關開期爲始每屆一年期滿由津海關道將所收
洋商采買歸化土貨子口半稅查開清單詳請咨明山西核入歸
化關奏銷案內辦理惟各處關期不同津關一年期內所收之數
與歸關一年期內所免之數必有參差礙難照數劃抵應如何酌
中撥補之處仍應查照同治四年戶部奏准成案由部酌核辦理
至此次議撥歸化關子口稅銀亦應查照津海關歷辦撥補成案
彙入各項六成洋稅銀內循舊撥發天津海防兵餉無庸解部以

符向章而濟要需所有擬請援案撥補歸化關短徵稅項緣由理合會同山西巡撫臣張之洞合詞具

奏伏乞

皇太后

皇上聖鑒敕部議覆施行謹

奏

撥協朝鮮礮彈片

光緒八年九月二十九日

再朝鮮六月初九日之變軍伍渙散器械遺失經中國水陸官軍
駛往援護剿捕亂黨局勢大定該國王力圖振作遴選將士講求
洋操陣法業由吳長慶揀派營中熟習西洋鎗礮之員幫同教演
前遣陪臣趙甯夏等來津謁商自強之策臣告以禦侮乃可保邦
練兵必先簡器往時朝鮮軍械樸陋僅用土鎗斷難制勝現欲覓
購洋鎗炸礮貧瘠既苦無資倉猝亦難濟用

臣仰體

朝廷字小之仁不能不爲設法籌畫開其風氣卽所以固我藩籬
因飭撥機器局舊製十二磅開花銅礮十尊配以開花子三千顆
木信三千六百枝門火六千枝礮藥四千五百磅炸藥一千五百
磅又英來福兵鎗一千桿配以紉洋藥一萬磅大銅帽一百萬顆
皮帶子袋各千副運送朝鮮俾發練軍之用現據軍械所委員劉

含芳等報稱已分批撥交赴朝鮮各輪船陸續運往由吳長慶轉交朝鮮國王驗收以助急需除咨照該國王並分咨總理衙門禮兵各部知照外理合附片具陳伏乞

聖鑒謹

奏

議覆張佩綸條陳六事摺

光緒八年十月初五日

奏爲欽奉

寄諭悉心妥議恭摺覆陳仰祈

聖鑒事竊臣承准軍機大臣字寄九月十九日奉

上諭張佩綸奏星象主兵請講武以靖藩服一摺據稱朝鮮亂作於內敵偪於外尖長慶一軍暫留鎮撫殆權宜之策非經久之圖條陳六事請飭籌辦等語朝鮮密邇陪都實爲東北屏蔽該國情形積弱現在變亂甫平鄰邦窺伺自應力爲護持以昭字小之義兼爲固圉之謀第其閒籌辦機宜措置必須審慎張佩綸所陳理商政預兵權救日約購師船奉天增兵永興籌備各條著李鴻章悉心酌度妥議具奏等因欽此仰見

聖慮周詳集思廣益至意欽悚莫名伏查朝鮮積弱不振強宗煽

亂經我

國家視同內服命將出師擒獲首惡李是應安置保定羣情震懾於是天下萬國皆知朝鮮爲我屬邦大義益明又有吳長慶一軍暫留鎮撫數月以來水陸將領及朝鮮陪臣自該國來津者臣詳加諮訪僉稱朝野晏然人心大定日本留護使館之隊爲數無幾亦與民相安該國王力圖振作臣遵旨籌商善後各務漸有端緒張佩綸所陳六事有已經辦定者有欲籌而未及辦者謹悉心酌度分條擬陳如左

一理商政

原奏當

簡派大員爲朝鮮通商大臣理其外交之政而國治之得失國勢之安傾亦得隨時奏聞豫謀措置等語查光緒六年十一月駐日

使臣何如璋致書總理衙門內有主持朝鮮外交議一篇以中國能於朝鮮設駐紮辦事大臣凡內地政治外國條約皆由其主持爲上策又稱時方多事鞭長莫及此策未能遽行其次則請遣員前往朝鮮代爲主持結約常經總理衙門面商於臣謂此事若密爲維持保護尙覺進退綽如儼顯然代謀在朝鮮未必盡聽吾言而各國或將惟我是問他日勢成騎虎深恐彈丸未易脫手原係當時度勢之論該衙門曾於七年正月請

旨派臣勸諭朝鮮與西國通商摺內聲明在案本年春開臣與美國使臣商辦朝鮮約稿奏派道員馬建忠提督丁汝昌前往襄助令朝鮮具照會聲明該國爲中華屬國顯寓主持調護之義嗣英德踵往議約朝鮮國王卽屬馬建忠轉稟臣處選派熟悉商務公法之員幫同辦理交涉事件該國內亂平後復遣陪臣趙甯夏

等來議善後亦諄諄以此相屬臣慮其君臣不諳外交或致措注失宜允俟國王咨到酌辦頃趙甯夏航海復來接有朝鮮國王咨文一件謹照鈔恭呈

御覽其云代聘賢明練達之士蓋欲臣薦員往助仍隱由該國王調度權可自彼操也若如張佩綸所陳

簡派大員爲朝鮮通商大臣理其外交並預其內政職似監國向來

敕使有一定體制通商大臣當與該國王平行辦事分際既難安洽以後各國與朝鮮交涉事件必惟中國是問竊恐

朝廷與總署不勝其煩矣惟是泰西通例凡屬國政治不得自主故與人結約多由其統轄之國主政卽半主之國可自立約亦只能議辦通商而修好無與焉今朝鮮與日本立約已越七年當時

約款竟認朝鮮爲自主之國在朝鮮昧於公例豈足深責而咨報禮部轉奏並未一加駁斥本年美英德三國訂約始申明中國屬邦字樣曰本方噴有煩言各國尙不免疑議將來換約時恐有饒舌儻

欽派大臣駐紮該國理其外交之政必將日本及美英各約盡一辦理殊非易事若不畫一亦非政體此目前之難也朝鮮爲東三省屏蔽朝鮮危亡則中國之勢更急乘此無事派大臣往駐以主持通商爲名藉與該國政府會商整理一切保朝鮮卽以固吾圉亦與泰西屬國之例相符第其國內政治中朝向不過問一旦陰掣其權而風土異宜人才荏弱措施張弛未必盡如我意若其陽奉陰違或被他人挑唆生隙

朝廷又將何以處之此日後之難也臣反覆籌維未敢遽決此策

應請

敕下軍機大臣會同總理衙門通盤籌畫定議覆奏至張佩綸請薦曾充專使熟悉洋情者以充其選何如璋上年曾發此議若派專使宜無如該員之熟悉情形矣

一預兵權

原奏亂黨殺大臣並殺日人嗣後當由中國選派教習代購洋鎗為之簡練倚角等語查趙甯夏等八月初面呈該國王請示善後六條內有整軍制一條即求中國為之設法經臣鈔送總理衙門在案嗣趙甯夏等商懇延請教師借給洋鎗炸礮又經臣轉飭吳長慶揀派精熟洋操員弁就近教練並籌撥銅炸礮十尊英來福兵鎗一千桿配齊藥彈分批解送吳長慶轉交該國王驗收應用業於九月二十九日附片奏明在案與張佩綸所擬辦法正同

一救日約

原奏日約莫貪於索費尤莫狡於駐兵聞告貸北洋安知非借中
帑以款東兵應無庸籌借日兵屯紮王城尤多隱患應由吳長慶
密謀箝制等語查前據趙甯夏等面稱國無一月之儲欲借債以
救急五月間馬建忠往朝鮮爲英德議約卽稟聞該國財用窘乏
日本有借銀五十萬之說該君臣恐受挾制未允嗣花房義質又
有代籌開礦扣還償款之議亦力持不可轉瞬設關雇員及一切
創舉經費實無所措該國急而求我自係萬不得已臣仰體
皇上字小之仁未便推諉致受日人籠絡轉生貳心因勸諭招商
局員唐廷樞於華商湊股籌借銀五十萬兩議明取息八釐分年
由該國關稅礦利攤還當經據稟分咨總理衙門禮部在案各國
借債本係常事卽中國亦屢向洋商認利借銀臣既爲朝鮮籌議

善後勅令華商借銀並非出自官帑似亦情理所宜況隱杜該國轉求日本之漸唐廷樞與趙甯夏等已會訂合同章程斷無失信中止之理今張佩綸疑爲借中帑以款東兵殊屬誤會臣前詢趙甯夏等日本償款該國另有指項茲復與筆談詰問據稱該國向有贈給釜山日本人之費近因通商停給算得一年日本館所贈給者可抵分年償款日後商局借項用於何處仍隨時報查所言尙切實可信謹將十月初二日筆談節略照鈔呈

覽至日約索費五十萬元原訂五年分繳適朝鮮派使赴日本臣即電商出使大臣黎庶昌勸令朝使向日本外務省商減兵費旋據黎庶昌九月十六電報日本不允減款只改爲十年分繳是每年僅繳五萬元朝鮮雖貧瘠尙不至爲難此卽所以救日約之索費也日兵進紮王城原約一年爲期吳長慶旣平內亂本可剋期

撤回臣因日兵未撤退

旨飭吳長慶督軍暫駐實密謀箝制之法現日兵駐王城僅二百餘人決不至有他患擬俟明年春間再令吳長慶撤回三營仍留三營俾資與衛俟日兵一年期滿撤盡慶軍乃酌量抽撤此卽所以救日約之駐兵也

一購師船

原奏陸軍護王都不如水軍護海口應

飭部臣迅撥巨款先造快船兩三艘由北洋選派將領駐守仁川較爲活著等語洵至富不易之論臣於本年八月覆奏添練水師摺內聲明海防經費各省籌解僅及四分之一請

飭戶部總理衙門再撥的款務足原撥四百萬之數尙未知部臣如何籌議今擬巡護朝鮮卽以固我門戶必須先造快船二隻查

總稅務司赫德送呈英廠新式大快船圖說每隻約價銀六十五萬兩李鳳苞在德國訪查新式價值不相上下昨函詢船政大臣黎兆棠據稱該廠仿造快船每隻連礮位約需銀四十萬兩雖不及英德各式之精利迅速而工料價值較減擬請

敕下黎兆棠趕籌定造快船二艘克期竣工專備北洋派防朝鮮之用並懇

飭部於海防經費外迅撥有著之款八十萬兩限一年內分批解交如解不足數准臣檄飭江海關道由現存出使經費項下挪撥隨時咨明戶部總理衙門知照

一防奉天

原奏朝鮮日益多事遼防亦宜豫籌請飭

盛京將軍抽練旗丁歸米慶統之與所部常滿萬人以備緩急等

語自唐迄明有事朝鮮皆由遼瀋進兵從無海道濟師之事緣中國自古舟師笨滯越國爭戰鮮獲利者今日東西洋輪船盛興一日千里而朝鮮形勢三面濱海更於水師爲宜輪船由煙臺至朝鮮漢江口一日夜可到由津沽亦不過三日若由遼瀋陸路至朝鮮王城須二十餘日往往緩不及事故欲防護朝鮮必以添練兵船爲要此時勢之宜變通者然遼防爲根本至計朝鮮後路抽練旗丁自屬要圖應請

敕盛京將軍選將簡器認真操練實精而不貴多宋慶所部現調赴金州旅順口設防與兵船相依護距瀋已遠未便兼統旗營應由該將軍另選明幹樸勤之員統之庶收實效

一爭永興

原奏朝鮮之永興灣嚴寒不冰俄人欲得其地駐船應會同吳大

激安籌力爭要害等語查朝鮮東北之永興灣形勢險固可作船
陽西人薈豔稱之上年中俄議約俄人調集兵艦駐海參威英法
各國皆疑俄欲攻奪永興而駐津俄國領事今升署公使之章貝
每向臣密言俄廷絕無此意本年英美德與朝鮮議約俄使先向
總理衙門探詢朝鮮與俄定界通商經朝鮮辨阻迄今尚未再議
似其本志非即欲進據永興者永興近接元山通商口岸將來各
國貿易互迫俄人亦難獨圖佔奪至該處距吳大澂駐兵之甯古
塔三姓軍春等處千餘里而遙中隔俄境水陸易宜山川閒阻吳
大澂兵力餉力斷難兼營似只可從緩籌議俟朝鮮整頓軍制力
能自顧北洋鐵艦快船購練齊備再隨時酌撥分往梭巡以壯聲
援

以上六事皆臣近日籌畫所及但辦理自有次第理合據實由驛

具陳是否有當伏乞

皇太后

皇上聖鑒訓示謹

奏

代朝鮮聘西士片

光緒八年十月初五日

再朝鮮陪臣趙甯夏等八月初面呈該國王請示善後六條內有
擴商務一條云舉國上下全昧商務關係之何如現今築埠頭建
稅關月期已屆而事變後措辦無方當雇請其人而司其權然後
可不失自主等語頃趙甯夏復齎該國王咨文來津內稱各國換
約在前一切交涉商辦事件茫然不知下手煩請酌量小邦應行
時宜代聘賢明練達之士東來隨事指導臣已於正摺內陳明顛
末並鈔咨呈

覽在案查該國與日本定約通商七年尚未設關徵稅將來美德
英各國踵來換約交涉機宜必須得人導助查有前駐津德國領
事穆麟德和平忠實曾在中國海關襄事五年諳練稽徵事宜熟
悉漢文漢語因與該國使臣巴蘭德不合辭官就幕屢求津海關

道周馥等願爲朝鮮效用趙甯夏等來津日久頗相投契茲擬爲朝鮮代聘前往襄助關務由趙甯夏與之妥立合同自當恪遵該國節制不至掣肘惟須有華員伴往聯絡商辦查有候選中書馬建常係道員馬建忠之胞兄向曾游學歐洲諳習公法洋情明練心地耿直前經出使日本大臣黎庶昌調充理事適暫假來津臣因馬建忠爲朝鮮君臣所信服亦薦令同趙甯夏前往隨事襄辦妥辦可資得力除由臣咨覆朝鮮國王並分咨總理衙門出使日本大臣知照外理合附片具陳伏乞

聖鑒謹

奏

謹將朝鮮國王來咨照鈔恭呈

御覽

朝鮮國王爲咨會事照得小邦締修外交救定內難實賴我

中朝綏靖至恩置貴大臣經畫遠謨前後襄辦靡不周極欽頌銜

結舉國同情竊小邦向不諳外務而各國換約在前一切交涉商

辦事件茫然不知下手煩請貴大臣酌量小邦應行時宜代聘賢

明練達之士迨茲東來隨事指導俾得藉手踴躍克微終始之惠

千萬幸甚爲此合行移咨請煩照驗施行須至咨者

光緒八年九月十七日發

二月初

奏明答覆朝鮮王三事摺

光緒八年十月十二日

奏爲接准朝鮮國王咨文三道酌量答覆恭摺仰祈

聖鑒事竊十月初八日朝鮮派來陪臣副護軍李載德金奭準等

齎呈該國王來咨派往保定省問李是應並懇轉奏乞

恩釋還等情臣飭李載德等馳赴保定並咨署督臣張樹聲飭屬

妥爲照料准其省問至所懇轉奏

天陛亟降許還之澤顯與疊奉

諭旨不符臣面謁李載德等嗣後該國王務懍遵前

旨毋庸再行瀆請並於咨覆文內聲明未敢冒昧代

奏以絕覬覦臣又密詢月起陪臣趙甯夏金允植等僉謂該國王

私情不能不代李是應乞

恩而其國中臣民則頗懼李是應釋還轉生內患也又同日領選

使吏曹參判金允植齎呈該國王咨文二件一因前派生徒在天津機器製造各局學習先後遣病東還所餘無幾請准撤回另購小器設局國中自行製造臣查該學徒遠役思歸若強令久留不能專心更少進益應聽其便將來代購小機器酌派工匠往該國教導業飭金允植隨時與局員妥商稟辦一係報明吳長慶派員教習該國兵隊已兩起挑選一千人臣分別酌量咨覆並勸令該國王及時簡器練軍以圖自強仰副

朝廷綏靖潛服至意謹鈔錄朝鮮國王咨文並臣咨覆文各三道恭呈

御覽除分咨總理衙門禮部知照外理合繕摺具陳伏乞

皇太后

皇上聖鑒謹

奏

謹照鈔朝鮮國王來咨並臣咨覆文各三道恭呈

御覽

朝鮮國王來咨

爲咨請事頃馳聘价憑情陳暴冀蒙本生父
賜還之音瞻望

皇慈日夕泣祝卽於使回伏奉

旨諭日月遺照霜雪綦嚴隕越於下益自震灼顧念本生父七臺
衰邁素抱癰疾天時漸寒風土殊宜萬里孤寄有誰救恤焦迫鬱
輜靡遑寢食擬申具情實鳴暴冀幸而恍迫

嚴威不敢徑情茲遣陪臣副護軍李載德前往保定府省問起居
先此咨懇伏乞中堂大人曲諒至情轉奏

天陛特推孝治之政

亟降許還之澤俾此骨肉聚保永戴

恩造不勝血懇之至為此台行移咨請照驗轉

奏施行須至咨者

光緒八年九月初八日到

覆朝鮮國王咨文

為咨覆事陪臣副護軍李載德等齎到貴國王咨稱使回伏奉

旨諭益自震灼顧念本生父七臺衰邁素抱癰疾天時漸寒風土

殊宜萬里孤寄有誰救恤擬申具情實鳴懇冀幸而恍迫

嚴威不敢徑情茲遣李載德前往保定府省間起居先此咨懇轉

奏

天陞亟降許還之澤俾骨肉聚保等因准此查光緒八年八月十

二十六等日疊奉

上諭特沛恩施姑從寬減李是應著免其治罪安插直隸保定府

永遠不在回國仍著直隸總督優給廩餼在其歲時派員省問以慰該國王思慕之情嗣後不得再行瀆請等因欽此仰見

大皇帝酌法準情仁至義盡薄海臣民莫不同聲欽頌本署大臣會同署直隸總督部堂張遵即派員將李昱應送往保定省城舊清河道署中妥爲安置按日優給廩餼煤米薪菜等項兩月已來據報李昱應在彼起居順適供給無缺雖年已六十有三精神強健無甚疾病尙屬調護得宜亦可稍慰貴國王之孝思而曲示體恤矣昨在禮部咨李應浚齋到咨文轉奏一摺十月初三日奉上諭著傳知該國王仍遵前奉諭旨恪守藩封務以宗社爲重嗣後毋得再行陳請等因欽此業由禮部轉行貴國王欽遵在案茲在前因當飭令李載德金奭準等馳往保定府省問此原係遵旨辦理之事至所懇轉奏

天陞亟降許還之澤顯與疊奉毋得再行瀆請之

諭旨不符本署大臣實未敢冒昧代奏貴國王當念保守宗社振興國事爲重不得復顧一己之私情致礙大局也爲此合行咨覆貴國王查照須至咨者

朝鮮國王來咨

爲咨會事照得本年七月初二日領選使吏曹參判金允植奉署理北洋大臣張札飭隨軍東還緣彼時小邦有亂軍之變該陪臣倉猝回國生徒學習等事均屬未清現蒙

天朝洪恩亂逆斯平該陪臣理應再赴天津照料學徒習業竊查學徒等自春以來不服水土遭病東還者前後相踵現今所餘無幾繼自聞變以後各念室家用志不專難望成效似宜從近撤還另購小器設局於國中使之溫理舊業爲製造之基茲復遣領選

使金允植稟商一切事宜撤還學徒煩請貴大臣將此事由轉奏

天陸特賜

允準不勝幸甚爲此合行移咨請照驗轉

奏施行須至咨者

光緒八年九月初二十七
日發十月初八日到

覆朝鮮國王咨文

爲咨覆事在貴國王咨稱領選使吏曹參判金允植回國後學徒等不服水土遭病東還者相踵現所餘無幾聞變以後各念室家用志不專難望成效似宜撤還另購小器設局國中溫理舊業爲製造之基煩請轉奏

天陸特賜

允準等因在此查光緒七年十一月間金允植率領員匠生徒等

來津學習製器業經本大臣奏明飭赴機器製造兩局查照議定章程認真教導該學徒自春徂秋多因不服水土遘病東歸現已所餘無幾擬准金允植全數帶回以示體恤惟貴國戎備之疏由於器械不利工技無學必須另購小機器設局國中遴派妥員嚴勤督率講求製造庶軍中所用洋鎗炸礮等利器可隨時修整添備以期進益本署大臣已飭天津機器製造局滑道王道等與金允植妥商隨宜代為購辦庶盡友誼除恭摺據情代

奏並分咨

欽命總理各國事務衙門

禮部外為此合行咨覆貴國王查照辦理須

至咨者

朝鮮國王來咨

為咨會事照得敝邦向來僻居無事式備積弛現與各國相通港

口多事講究陰雨不容少緩茲值大兵來駐師受有資已飭所司
選集民丁咨請吳軍門派員教習在本年九月二十三日吳軍門
回咨據稱派慶字軍營務處袁世凱挑選一營五百人名為新建
親軍督同王總兵得功認真訓練並續派朱提督先民督同何總
兵增珠添選一營五百人以便訓練等因現方課日督習從此做
邦軍制庶有日新之效實賴貴大臣仰體

皇慈勤念藩服之至意實深感佩茲將選兵訓練事由先行咨送
請貴大臣查照須至咨者

光緒八年九月初八日到
發

覆朝鮮國王咨文

為咨覆事准貴國王咨稱大兵來駐師受有資已飭所司選集民
丁咨請吳軍門派員教習先後挑選一千人認真訓練現方課日
督習做邦軍制庶有日新之效等因准此具見貴國王洞悉時艱

講求戎備以爲自強之計欣佩莫名吳軍門久經大敵謀勇兼裕
所部將弁多熟諳鎗礮操法戰守得力之員茲旣避派督操必能
盡心代謀本署大臣仰體

聖朝塵念藩服至意甚盼貴國軍政日有起色及時整頓保邦禦
侮之道胥基諸此爲此合行咨覆貴國王查照須至咨者

查覆馬建忠參案摺

光緒八年十月十二日

奏爲遵

旨確切查明據實覆陳仰祈

聖鑒事竊臣等承准軍機大臣字寄九月十九日奉

上諭有人奏日本與朝鮮定約如兵費五十萬元及兵駐王城兩

條所關甚大聞道員馬建忠實主其事且言賠償兵費朝鮮無資

可由中國商局代借又恐李鴻章等察出乃屬朝鮮使臣彌縫其

失筆談中謂此約非建忠主謀正其欲蓋彌彰吳長慶亦歸罪該

道謂其擅預日約任性妄爲等語此次朝鮮與日本定約究竟馬

建忠曾否預聞其事著李鴻章張樹聲確切訪查據實覆奏毋稍

徇隱原片著鈔給閱看等因欽此伏讀原片稱中國方計檢李是

應並誅亂黨何以兵在其郊於該國定約大事轉不預聞該國君

臣當是應見揜倉皇失措之際又何以能從容遣使祕密定盟絕
不關白我軍皆非情理所有等語查朝鮮內亂初起中國派兵援
護臣樹聲於六月二十九日接出使日本大臣黎庶昌電報該外
部來文言朝鮮立約待以自主須據約照辦使館國各自護如派
兵護持恐滋葛藤卽經兩達總理衙門旋在七月初一日覆函云
日既不願中國代護使館我軍卽專爲朝鮮定亂又彼既不願中
國爲之保護則逐使一節先可置之不問惟中國爲屬邦定亂自
非彼應與聞等語當經鈔致吳長慶馬建忠等遵照妥辦是日本
與朝鮮如何議約彼既認朝鮮爲自主中國本難過問卽使與聞
其事日本必不遵允所在情理之中無足怪者又原片稱馬建忠
聽兩國私歆竊和事先絕無聞見事後復不爭持形同讐謬等語
查七月十四日日約未議之先朝鮮國王派戶部尙書金炳始副

官金宏集兩次赴馬建忠處訪問日本所索七條該道筆談業將約款分別可許不可許明晰相告內如兵費與卹銀統算不可過十萬元又京內屯置大隊萬不可許若該使爲保身之計隨稱弁兵在館亦不宜列入款內經上等據其節略鈔送總理衙門在案是事先非絕無聞見但金宏集等爲勢所逼未能照馬建忠所言固無如何至彼既以全權畫押定議而歸事後更無從爭持矣又原片稱朝鮮之約馬建忠不但預其謀並且主其事其始謂當由中國償費謝罪繼謂賠償兵費乃中外交涉正辦朝鮮無資可由商局代借等語查七月初三日我軍未到之先馬建忠在仁川與日本領事竹添進一議及此事曾歷舉中國滇案及西國故事雖有兵事亦多不認兵費此件筆談經臣樹聲錄送總理衙門在案迨金炳始等十四日詢商馬建忠初以兵費不可償旋因金宏集

固請則謂與卹銀統算不過十萬元足矣尙屬相時立論至十六日金宏集在仁川自與花房義質定議後致書馬建忠有賠款太濫不免爲辱命之歸慚憤欲死等語又經臣鴻章鈔送總理衙門在案此可爲馬建忠並未預其謀主其事之鐵據茲檢出七月十六日亥刻金宏集手書原稿咨送軍機處備核至朝鮮借招商局之款另作別用臣鴻章已於十月初五日覆陳朝鮮六事摺內詳確陳明矣又原片稱該道屬朝鮮使臣彌縫其失筆談中謂此約並非建忠主謀正其欲蓋彌彰等語查七月二十六日臣等傳見朝鮮大官趙甯夏金宏集詰責賠款之濫金宏集俯首謝罪並稱馬道在京相距近百里難以從中排解原係實情何須轉屬朝鮮代爲彌縫也又原片稱吳長慶到津亦歸罪該道擅預日約任性妄爲等語查吳長慶八月間來津商籌軍事上等疊次面詢當日

情形實無歸咎馬建忠預日約之說茲奉

寄諭因情節重大特再專輪往朝鮮面廣密詢吳長慶令其據實
登覆頃據吳長慶咨呈該軍於七月十三日進紮王城與馬建忠
商檢李昱應十五夜圍剿枉尋里利泰院十六日邀同馬建忠訊
辦所獲亂黨其時日兵退至仁川相隔八十餘里何得有干預情
事花房所索五十萬元係朝鮮全權大臣等受其恫喝已允在先
未便因我軍定亂代翻前議致生事端十九日馬建忠起程回津
諭及賠款太多曾貽書花房勸其自行裁減是其未預斯約顯然
易見茲復邀金宏集來營再三細訊據稱當日實因東使恫喝倉
猝徑許馬建忠事後始得聞知毫無干預各等語是吳長慶並無
歸罪馬建忠之處確有明證矣又原片稱前明關白封貢之役因
沈惟敬詭詐百端致起日人悖慢馬建忠爲天主教民與沈惟敬

同一市井無藉恐蹈覆轍等語查明萬歷閒沈惟敬給日以致敗
軍價事今馬建忠因未奉有預議日約明文只能從旁勸朝鮮誠
日人以減賠款力所不及心固可原絕非沈惟敬詭詐僨事可比
至該道幼習儒書屢試不售嗣游學泰西兼習法文本非教民亦
非市井本年美英德各國與朝鮮議約實賴其前往贊助聲明中
國屬邦字樣俾大義復昭於天壤此次捻致李是應並籌辦善後
事宜機敏異常才能應變卽西人亦敬重之夫洋務人才難得論
人者不免苛求用人者當知護惜臣等何敢空言誣罔致令任事
者裹足寒心哉所有確切訪查各緣由謹合詞繕摺據實稟陳伏
乞

皇太后

皇上聖鑒謹

奏

朝鮮會勘邊界摺

光緒八年十二月初八日

奏爲朝鮮國王咨請派員會勘邊界事宜恭摺具陳請

旨飭遵事竊臣前欽遵

諭旨督同津海關道周馥等與朝鮮陪臣魚允中等會議朝鮮水陸通商章程內第五條聲明鳴綠江對岸柵門與義州二處又圖們江對岸琿春與會甯二處聽邊民隨時往來交易仍於開市處設立關卡稽查匪類徵收稅課從前館宇餽廩芻糧迎送等費悉予罷除至邊民錢財罪犯等案由地方官按照定律辦理一切詳細章程應俟北洋大臣與朝鮮國王派員至該處踏勘會商稟請奏定等因經臣奏交總理各國事務衙門會同禮部議覆具奏奉旨依議欽此轉行知照在案旋據魚允中面稟擬告於本邦明春往鳴綠圖們二江一帶察看情形會同該地方官勘商酌行再到

津稟定等語即經臣分咨

盛京吉林將軍奉天府尹暨太僕寺卿吳大澂等各先行就近派員會同朝鮮官體察情形勘商妥議再訂詳細章程原因邊民互市雖經奏准變通而歷來法制禁令有須互相參酌之處非其本省派員勘商恐難操縱合宜昨奉十一月十四日

寄諭崇綺松林奏朝鮮貿易宜嚴定限制嗣後有關奉省事宜與該國王如何會商應咨照將軍府尹公同斟酌再行定議飭即妥議會奏等因欽此正與臣處所籌辦法大略相同其摺片內條陳各節業經臣欽遵分別妥議准駁咨請總理衙門禮部會核覆奏矣現據朝鮮國王咨稱擬派副護軍魚允中於明年二月初旬前往義州四月下旬轉往會甯慶源等處踏勘商定望煩飭派官員屆期會勘以便酌行等語謹照鈔該國王來咨一件恭呈

御覽竊維奉吉地方交涉情形及

列朝法制禁令隔省人員人地生疏恐其未能洞悉此次與朝鮮
定章變通互市實爲體恤屬藩禁革積弊起見而嚴杜侵越豫防
後患之處亦當熟慮深籌自應由該將軍府尹大臣等揀派廉正
明練大員屆期會同朝鮮陪臣魚允中踏勘妥商各就地方情形
擬議詳細章程稟由該將軍府尹大臣公同斟酌咨商臣處詳慎
覆核定議再行具奏請
旨遵辦合無仰懇

飭下

盛京吉林將軍奉天府尹督辦甯古塔等處事宜太僕寺卿吳大
澂查照妥辦除由臣分咨知照並咨覆朝鮮國王外理合繕摺出
驛具陳伏乞

皇太后

皇上聖訓示謹

奏

照鈔朝鮮國王來咨一件恭呈

御覽

朝鮮國王爲咨會事照得敝邦義州會甯慶源等處與

上國邊界人民互市向來統由官員主持諸多窒礙幸賴貴大臣
曲軫流來之弊妥籌經久之圖因時制宜酌予變通定於兩國邊
界柵門瑯春與義州會甯慶源等處聽民隨時往來交易將從前
慣例概行豁除列入水陸貿易章程第五款內聲明請

旨定議遵照辦理在案此莫非貴大臣仰體

皇仁永綏藩服至意謹與一國臣庶攬手感頌不任銜結其詳細
章程須派員至該處會商酌行茲擬派副護軍魚允中於明年二
月初旬前往義州四月下旬轉往會甯慶源等處踏勘商定望煩
貴大臣飭派官員屆期會勘以便酌行除定期派員外相應備文

奏明請賞大臣查照酌覆須至咨者

光緒八年十月初六日到

奏明朝王咨謝二事片

光緒八年十二月初八日

再臣同日接准朝鮮國王咨文二件一申謝所訂商民水陸貿易章程八條悉屬公允擬俟前頭使行片行奉

表叩

謝恭伸感激之私一驗收臣處撥給來福鎗開花礮及藥彈銅帽門火各項現交該國新團勇丁領用由吳長慶指授練習次第整頓期有成效等因謹照鈔該國王來咨恭呈

御覽除分咨總理衙門禮部外附片具陳伏乞

聖鑒謹

奏

照鈔朝鮮國王咨文二件恭呈

御覽

朝鮮國王爲咨覆事照得本邦於本年春閒咨請於已開口岸互相交易一摺時值貴大臣奉諱回籍未及覈辦旋由禮部據分咨奏蒙

俞允應詳定章程之處著貴衙門妥議至秋閒貴大臣勉膺

諭旨復起視務督海關道臺與問議官魚允中等酌商擬定兩國商民水陸貿易章程八條覆

奏經總理各國事務衙門會議奉

旨依議仍於九月二十六日魚允中回承准貴大臣咨行並鈔錄總理各國事務衙門覆

奏摺及兩國商民水陸貿易章程欽遵查照等因准此竊本邦久

列藩封一切典禮均有定制向賴貴大臣代辦已與各國立約通商而獨

上國與本邦商民尙拘例禁不能共霑利益殊非中外一視之義所有前此瀆請迺蒙

皇上廣推洪慈亦惟貴大臣亟恢遠圖因時變通務存體恤所訂章程八條悉屬公允喜出望外並於章程之首聲明中國優待屬邦不在各與國均霑之列等語俾小邦感奮自強用答我

大朝懷柔之至意此誠數百年來協有之

特典當職謹與一國臣庶北望攢頌擬俟前頭使行奉

表叩

謝恭伸感激之私除先通稱

謝外合行咨覆請貴大臣查照辦理須至咨者

光緒八年十月初七日發

六日

朝鮮國王爲咨覆事照得貴大臣爲念敝邦軍變以來器械散失
練選時急飭撥天津軍械所十二磅銅開花礮十尊英來福兵鎗
一千桿配齊炸彈木信門火銅帽洋藥各項運由提督吳軍門派
員交付茲遵計開驗收仰惟貴大臣克體

皇朝覆轡之仁而軫屬邦急難之誼攢手感頌曷任銜結現今新
團勇丁率循吳軍門指授練習次第整頓俾此無兵而有兵無械
而有械用爲保邦制治之本思自奮發俟有成效嗣後情形隨當
無隱冀紆遠猷以惠終始爲此合行咨覆請照驗施行須至咨者
光緒八年十月十七日
發十二月初六日到

商局接辦電綫摺

光緒八年十二月初八日

奏爲津滬電報辦有成效擬請招商接辦由滬至浙閩粵各省沿海陸綫以杜外人狡謀而收中國自有之權利恭摺仰祈

聖鑒事竊臣於光緒六年八月奏請由天津陸路循運河至鎮江上海設立陸綫電報籌款墊辦俟辦成後擇公正商董招股集資接辦並設電報學堂教習生徒自行經理是年八月十四日奉

上諭現在籌辦防務南北洋必須消息靈通以期無誤事機該大臣請於陸路山天津至江北鎮江達上海安置電綫係爲因時制宜起見卽著妥速籌辦並著江蘇山東各督撫飭令地方官一體照料保護勿任損壞餘均照所議辦理等因欽此仰見

朝廷主持要政裨益軍謀之至意欽服莫名當經督飭前津海關道鄭藻如候補道盛宣懷劉含芳等妥議章程與丹國大北電報

公司商立合同代爲購料雇人查勘設綫道路以資熟手指導自
七年五月初興工至十月底工竣南北中外消息瞬息可通仍照
奏案招商集股自八年三月初起歸商接辦由官督查臣仍籌貼
每年沿途弁兵巡費一萬一千兩以示體恤五年後如電資有餘
再行截止夏開朝鮮內變急調南北水陸各營實賴電報靈捷其
赴機之速爲從來所未有卽總理衙門與臣等密商出洋各使臣
及南省要務莫不旋至立應成效已灼然其見矣十月間英法美
德各使請在上海設立萬國電報公司擬添由滬至香港各口海
綫英國署使臣格維訥並援同治九年總理衙門已允成案請由
英商添設自上海至甯波温州福州廈門汕頭各口海綫其勢幾
難禁遏臣與總理衙門往返商惟有勸集華商先行接辦由滬
至粵沿海各口陸綫以杜外人覬覦之漸而保中國自主之權使

彼族無利可圖或者徘徊中止且沿海各省與京外籌商軍國要
事調兵催餉均得一氣靈通於洋務海防實有裨助而商民之轉
輸貿易者亦藉電報速達利益更廣因飭津滬電報局委員盛宣
懷等傳集眾商妥晰會議頃據盛宣懷會同商董候選道鄭官應
候選主事經元善國子監學正銜謝家福副將王榮和等聯銜馳
稟擬請自蘇州浙江福建通商各海口以達廣東與現在粵省所
辦陸綫相接計將六千里照津滬陸綫成本工費核算約需銀四
十餘萬兩沿途分設局棧常年用費亦倍於津滬現有大北公司
海綫直達香港或將來英商再添水綫勢必互相跌價傾擠籌辦
實屬不易惟欲收我中國自有之權利必當竭力籌維勸集鉅資
次第開辦以盡報效之忱公議章程十條呈請察核並請援案奏
明請

旨敕下蘇浙閩粵各督撫轉行經過地方官一體照料保護等情前來臣查核所議章程尙屬周妥謹照鈔恭呈

御覽當此外人窺伺之際必須激厲華商羣策羣力共圖抵制雖浙閩粵各省道里較遠民情不一而同治十三年沈葆楨奏請在閩境興辦電綫速通軍報業奉

旨准因循未就署兩廣督臣曾國荃等現因英商議設水綫至省飭粵商興造陸綫以拒敵謀業有成局可知風氣漸開南中官民皆知電報爲有益軍國商旅之事況自津達滬二千數百里陸綫成後沿途毫無擾累各省必有風聞擬請

敕下江蘇浙江福建廣東各督撫臣轉飭經過各地方官妥爲勸諭隨事照料保護勿使稍有阻撓損壞以期事在必成庶免華商裹足外人貽笑而各國添設海綫之謀當漸消阻實於交涉大局

有碑除鈔錄章程分咨總理衙門南洋大臣暨各督撫查照外所有撥案招集華商接辦沿海陸綫緣由是否有當伏乞

皇太后

皇上聖鑒訓示謹

奏

謹將華商公議接辦蘇浙閩粵陸路電綫章程十條照繕清單恭呈

御覽

一道里宜先約計也查自江蘇省蘇州府經浙江之湖州嘉興杭州紹興甯波台州温州等府福建之福州興化泉州漳州等府廣東之潮州惠州二府以達廣東省城廣州府約共五千六百里五十里內自温州以達廣州似可按沿海州縣驛站設綫杭嘉湖三府係絲商碼頭必得繞由經過以順商情甯波至温州沿海山路荒僻應繞道嚴州衢州或繞金華處州俟奉奏在卽當請派專員督率洋總管分路查看繪圖計里屆時再請咨行查照

一經費宜先酌定也查津滬電綫三千里計動支經費十八萬兩現計自蘇至粵道里加倍約須費四十萬兩應設分局分棧恐尙

不止加倍經費必須寬籌查電局收支款目皆係洋款現擬併連津滬電綫通集華商股本英洋八十萬元卽以一百元爲一股由局刊發股票給執惟招股必宜先儘舊商如舊商無力再聽新商入股

一巡費宜請津貼也津滬巡綫經費每年一萬餘兩係奉批准五年之內由軍餉開支現在浙閩粵三省巡費每年約須湘平銀二萬兩應請奏准由官津貼發局轉給以重巡護而紓商力

一學生宜請添習也津滬電局管報學生皆由天津學堂隨時撥往擬請現有學生趕緊教習外再招諳習英文學生四五十名一體教習約於來年年底卽可撥局派用至測量學生前於出洋學生二十名內挑出八名交洋總管教習有效應請再選八名發局教習以備各分局總管報房之選

一查路宜選能員也津滬設綫係分南北兩路派員會同各省文武地方官按電綫所經之地計里分段先將巡兵逐段派定並曉諭民人一體知曉庶設綫到境不致阻礙耽延此次仍應稟請選派能員分赴各省會同地方官查照辦理

一監工宜派大員也查津滬設綫南北兩路均有大員一人監工此次仍應稟請選派大員督率洋匠人等分投辦理並請咨浙閩粵三省各派妥員會同照料以免貽誤

一開工宜資熟手也前次南路工程所調銘軍二百名勤捷過於民夫此次開工擬請仍調從前銘軍熟手二百名赴工由局酌發賞項以收事半功倍之效

一巡守宜立勸懲也查津滬電綫沿途設立巡電房實成綠營汛兵看守各汛弁兵由局各給馬乾口糧月分大段梭巡均有專責

此次設綫自應援案咨請督飭巡護遇有貽誤損壞由局隨時稟請核辦

一官報宜仍登記也軍機處總理衙門各督撫將軍出使各國大臣來往洋務軍務電報仍照章列作頭等信資另冊存記按年彙報以抵官貼巡費俟扣畢別無應還官項則前項官報毋庸給資以盡報效之忱其代轉洋商公司電報仍給信資轉發不在扣除之例

一材料宜請免稅也電桿應用木料甚多須各就近處采辦應請援案免納稅釐至於電綫電器進口各口擬在隨時咨請關道給發免單

海防支應請銷摺

光緒八年十二月十七日

奏爲查明天津海防支應局光緒七年分收支餉需循照向章按款造冊請銷恭摺仰祈

聖鑒事竊據天津海防支應局司道詳稱津郡海防改設練軍並原設海口礮臺通永鎮大沽協官兵雲字營馬隊應需餉乾等項向在津海關六成洋稅洋藥釐捐東海關協餉長蘆鹽斤復價甯河釐捐各項下隨時籌撥按照定章並直隸練軍營制樽節支放所有光緒六年分收支款目業經奏准銷在案查光緒七年分收支款內有天津軍械所管理收發海防水陸各營西洋新式軍械在於津郡西沽原建庫屋收存歲積月累儲積充盈添蓋庫屋原募護勇不敷看守添募護勇二棚小心照料以昭慎重應支口糧查照向章什長二名各月支口糧銀三兩護勇二十名各月支

口糧銀二兩均自光緒七年四月初一日奉准添募之日起支又奉戶部議覆通永鎮總兵唐仁廉歲支俸廉等項在照大沽海防章程自光緒七年春季起除例支減成俸廉等銀仍飭司按數撥給外其加給三成俸銀四成養廉等銀應飭支應局按季發給於報銷冊內送部核銷等因嗣准藩司覆稱武職各官俸廉司中照章給發六成實銀並非俸薪七成養廉六成今通永鎮俸廉既奉部覆准發十成全銀仍由司核給六成應由支應局統加四成銀兩以符定額卽由局查照發四成俸薪養廉其例馬仍按三成找給自光緒七年春季起支發又大沽雇募海勇改練成營應支餉項另案支發所有原支口分於光緒七年五月底住支其餘支發一切款項悉照奏定章程及歷年海防准銷成案按月核給造具細數清冊詳請奏咨前來臣逐加覆核計自光緒七年正月初

一日起連閏至年底止共收款銀三十九萬八百八十三兩四錢七釐六毫一絲六忽一微其支款應歸戶部核銷銀三十四萬四千二百八十二兩九分八釐一毫九絲九忽四微應歸工部核銷銀四萬八千二百七十二兩七錢一分六釐九毫七絲八忽二微其應銷銀三十九萬二千五百五十四兩八錢一分五釐一毫七絲七忽六微除本案內扣收過平餘銀四百八十二兩七錢二分七釐一毫六絲九忽七微儘數動支外計不敷銀一千一百八十八兩六錢八分三毫九絲一忽八微均係隨時籌墊並承辦各員請領未發之款俟往部覆再行分別找給歸墊除清冊咨部查照外所有光緒七年分天津海防收支餉銀造冊請銷緣由謹會同署直隸督臣張樹聲恭摺具奏伏乞

皇太后

皇上聖鑒敕部核銷謹

奏

吳毓蘭政蹟片

光緒八年十二月十七日

再據天津府紳士三品銜前戶部郎中高學洪翰林院庶吉士王恩淮分發山東候補知縣辛榮等聯名稟稱原任布政使銜天津河間兵備道吳毓蘭在任兩年有餘於地方教養諸政靡不盡心考究百廢具興而於河工水利尤所注意每奉委勘估興修輕騎減從往返周歷雖隆冬盛暑冰霜烈日之中延訪紳耆悉心諮度未嘗稍言勞瘁本年三月間因前在軍營積勞傷疾復發值子牙南運兩河工程同時並舉力疾赴工查勘回津後病勢已深尙於臥榻辦公心力交瘁遂致不起遠近聞之莫不痛惜職等追思其善政如修復津郡濠牆俾城廂得資捍衛培築運河隄岸俾河流永慶安瀾興靜海縣水利則斥鹵變為膏腴種子牙河隄工則渾沱仍歸故道隄修千里商旅得以暢行田闢軍糧灌溉羣謀樂利

籌冬春賑撫流民來集獲免帝飢號寒興書院文教多士奮興皆
願執經問字清釐積案窮民免株累之虞嚴辦盜徒閭里息荏苒
之警凡此數端皆彰彰在人耳目與情愛戴實深查前升任天津
道丁壽昌在直隸臬司任內病故曾蒙奏在建立專祠今吳故道
勤政愛民事同一律環懇援案奏請准在天津府城捐建專祠並
開具簡明政蹟事實請

奏前來臣查吳毓蘭樸誠廉慤辦事實心其在天津道任內勤懇
愛民孜孜求治凡所措施皆有益地方之事宜乎民情愛戴沒齒
不忘茲由該紳士等聯名稟請建祠查吳毓蘭曾隨前大學士曾
國藩在揚州剿滅賴文光捻股相應據情籲懇

天恩准將原任天津道吳毓蘭附祀曾國藩天津專祠由地方官
春秋致祭以彰治行除將該故道政蹟事實分咨查照外附片具

陳伏乞

聖鑒訓示謹

奏

李文忠公奏稿卷四十五